

## ANDRO FIARAHA-MIVAVAKA SY FIFADIAN-KANINA TELOVOLANA FAHAROA 2022

---

### Mivavaka Araka Ny Hafatry Ny Anjely Telo

#### Tari-dàlana ho an'ny Mpitarika

#### Tonga soa - Andao Hiara-mivavaka

Manasa anao izahay hiaraka amin'ny vahoakan'Andriamanitra maneran-tany amin'ny fankalazana ny Andro Fiaraha-mavaka isan-telovolana. Na manao ahoana na manao ahoana ny halehiben'ny fihaikana atrehinao, dia lehibe lavitra noho izany ny Andriamanitsika!

Ao anatin'ny taona feno fahaverezan-javatra maro sy alahelo, dia manome fanantenana mihoatra noho izay eritreretintsika Izy:

*"Koa aoka isika hanatona ny seza fiandrianan'ny fahasoavana amin'ny fahasahiana, mba hahazoantsika famindram-po sy hahitantsika fahasoavana ho famonjena amin'ny andro mahory." (Heb. 4:16).*

Ao anatin'ny tontolo feno zavatra tsy azo antoka dia mamaly toy izao ny teny fikasany:

*"Antsoy Aho, dia hovaliako ianao ka hampisehoako zavatra lehibe sy saro-pantarina izay tsy fantatrao." (Jer. 33:3).*

Ary ho an'ny mpino izay manenina ny amin'ny lasa na matahotra ny amin'ny ho avy, dia manome fanasana mivelatra Izy manao hoe:

*"Mankanesa atỳ Amiko, ianareo rehetra izay miasa fatratra sy mavesatra entana, fa Izaho no hanome anareo fitsaharana" (Mat. 11:28).*

Tsy misy vavaka tsy voamarik'Ilay Raintsika be fitiavana any an-danitra, Izay miandry fatratra ny handrotsaka fitahiana rehefa mangataka ny olony. Miangavy anao mba hiaraka aminay hanangona ny mambran'ny fiangonana, ny namana sy nympifanolo-bodirindrina mba hitady ny fahendren'Andriamanitra ary hitaky ny teny fikasany tsy mety ritra!

#### Ny Lohahevitra amin'ity Taona 2022 ity: Mivavaka Araka ny Hafatry ny Anjely Telo:

Amin'ity taona ity ny tari-dàlana ho an'ny Andro Fiaraha-mivavaka isan-telovolana dia hifantoka amin'ny vavaka amin'ny alalan'ny hafatra ara-potoanan'ny anjely telo ao amin'ny

Apokalypsy 14:6. Ny vavaka amin'ny alalan'ny Soratra Masina dia manome heviny ny vavaka ataontsika ary mamela an'Andriamanitra hiteny mivantana amin'ny alalan'ny Teniny. Mety efa mahafantatra angamba ianao fa ny hafatry ny anjely telo dia mandrafitra ny ampahany manan-danja amin'ny maha-izy azy ny Advantista Mitandrina ny Andro Fahafito. Mety efa hainao tsianjery ireo andininy ireo. Kanefa mahagaga fa mbola maro ny Advantista no tsy mahay manazava ny antony maha-zava-dehibe ireo hafatra ireo. Mifanaraka amin'ny inona amin'ny sary lehiben'ny famonjena ireo hafatry ny anjely telo ireo? Inona no ambarany momba ny fitiavan'Andriamanitra? Inona no fiantraikan'izy ireo eo amin'ny fiainako, ary amin'ny fomba ahoana no ahafahako mizara izany amin'izao tontolo izao?

Na dia tsy nokendrena ho fampianarana teolojika aza ny tari-dàlana momba ny Andro Fiaraha-mivavaka, dia manantena izahay fa hitarika anao kosa izany hivavaka an-kitsim-po sy amin'ny tanjona mazava ary hitady fahatakarana lalindalina kokoa ireo hafatr' Andriamanitra farany sy sarobidy ho an'izao tontolo izao.

### **Asao Ny Olona Rehetra – Ny Tanora sy ny Antitra**

Mety mahatsikaritra fiovana ianao raha ampitahaina tamin'ny taona lasa: ireto hetsika ireto dia natao indrindra ho an'ny vondrona mifangaro. Tianay ny hanentana ny olona rehetra mba hiara-mivavaka: ny ankizy sy ny ray aman-dreny, ny zatovo sy ny efa misotro ronono, ny mpitovo ary ny efa manam-bady, ny kristiana nandritra ny androm-piainany ary ireo liana te-hahafanta-javatra. Miangavy anareo hampifanaraka ireto fitaovana ireto amin'ny vondrona misy anareo.

Maro amin'ireo hetsika amin'ny vavaka hatao no manan-danja kokoa raha manatrika eo ny ankizy sy ny tanora. Aza hadino ny manasa azy ireo mba hizara ny hafaliany sy ny talentany mandritra ny Andro Fiaraha-mivavaka ataonareo.

## Soso-kevitra Ho an'ny Mpitarika ny Andro Fiaraha-mivavaka

- Ny Sabata voalohany amin'ny telovolana dia atokana ho Andro Fiaraha-mivavaka. Ireo fitaovana ireo koa dia azo ampiasaina amin'ny hetsika hafa momba ny vavaka na vondrona tanora aza.
- Ireo hetsika amin'ny Andro Fiaraha-mivavaka amin'ity taona ity dia natao ho an'ny vondron-taona samihafa miara-mivavaka. Aoka ho vonona hanasa olona maro amin'ny sokajin-taona samihafa. Iangavio ny ankizy, ny tanora, ny raibe sy renibe, ny olon-dehibe tokan-tena ary ny hafa koa hanampy amin'ny fitarihana ny hetsika.
- Raha tianao dia atombohy amin'ny hira ataon'ny vondrona mpihira na hira hafa manan-danja amin'ny fiangonanao sy ny kolontsaina misy anao ny fotoam-bavaka. Satria ny Andro Fiaraha-mivavaka amin'ity taona ity dia natao ho an'ny sokajin-taona maro, dia diniho ny hampiditra hira ankafizin'ny isan-tsokajiny rehetra. Iangavio ny tanora na ny fianakaviana mba hanampy amin'ny fisafidianana sy fitarihana ny hira sy ny feon-javamaneno.
- Ampirisiho ny mpandray anjara hanao vavaka fohy mba hazahoan'ny rehetra mandray anjara.
- Ity tari-dàlana momba ny Andro Fiaraha-mivavaka ity dia misy soso-kevitra momba ny hetsika atao ao anatin'ny fotoana dimy:

**Fotoana 1:** Fotoam-pivavahana zoma maraina any amin'ny sekolin'ny fiangonana na fivorian'ny tanora na hetsika hafa

**Fotoana 2:** Fotoam-pivavahan'ny fianakaviana ny zoma hariva. (Ny fianakaviana dia tonga araka ny endriny sy ny isan'ny olona ao aminy. Raha olon-tokana ianao dia hevero ny hanasa namana na mpifanolo-bodirindrina ho ao an-tranonao, na ivelan'ny trano)

**Fotoana 3:** Fitokanana am-bavaka ataon'ny tena manokana amin'ny Sabata maraina (Ataovy ho fotoana manokana miaraka amin'i Jesosy izany. Raha manana zanaka kely ianao dia ataovy ho fifaliana ny manao ireo hetsika ireo miaraka aminy)

**Fotoana 4:** Fanompoam-pivavahana Sabata maraina any am-piangonana.

**Fotoana 5:** Fotoam-bavaka Sabata tolakandro any am-piangonana na toerana hafa.

**Safidy Hafa:** Azonao atao ny manitatra ny fotoam-bavaka ho an'ny olon-dehibe sy ny zatovo aorian'ny Fotoana faha-5 amin'ny Sabata tolakandro. Jereo ny Toro-làlana ho an'ny Vavaka Iombonana mba hahazoana soso-kevitra.

### **Lisitry Ny Fandrindrana Fototra**

- Miresaha mialoha amin'ny pasitora sy ny komitim-piangonana ary ampidiro ao amin'ny programan'ny fiangonana amin'ny Sabata voalohany amin'ny telovolana ny Andro Fiaraha-mivavaka
- Manomboka herinandro maromaro mialoha, ambarao ao am-piangonana sy amin'ny filazan-draharahan'ny fiangonana ny hetsika momba ny Andro Fiaraha-mivavaka Ampahafantaro ny olona fa ny hetsika amin'ity taona ity dia natao indrindra ho an'ny sokajin-taona samihafa.
- Ampirisiho ny mambran'ny fiangonana mba hanasa ny namana mpiara-monina hanatrika ny hetsika Andro Fiaraha-mivavaka. Ny hafam-pitiavana ara-potoana avy amin'Andriamanitra dia natao ho an'ny rehetra!
- Ataovy dika vita printy ny Taratasy ho an'ny fiangonana ary zarao herinandro maromaro mialoha. Azo atao koa ny mizara ny toromarika mandritra ny Andro Fiaraha-mivavaka ho an'izay mbola tsy nahazo izany.
- Atao dika vita printy ny takelaka momba ny hetsika ho an'ny Fotoana 1, Fotoana 4, ary Fotoana 5. Manendre mpitarika ho an'ny fivoriana tsirairay.
- Ataovy dika vita printy ny taratasy momba ny hetsika ho an'ny Fotoana 2 sy Fotoana 3 ary zarao ho an'ireo mpandray anjara amin'ny Andro Fiaraha-mivavaka, herinandro iray na roa mialoha. Ampiasao ny fametahana afisin'ny fiangonana na ny fotoana filazan-draharaha mba hanazavana fohifohy ny Fanompoam-pivavahana Zoma hariva (Fotoana 2) sy ny Fitokanana am-bavaka ataon'ny tena manokana ny Sabata maraina (Fotoana 3). Ampirisiho ny mambran'ny fiangonana amin'ny sokajin-taona rehetra mba handray anjara. Mandefasa fampahatsiahivana elektronika raha azo atao.
- Ataovy dika vita printy ny Toro-làlana momba ny Vavaka Iombonana ary manendre mpitarika iray raha mikasa ny hanitatra bebe kokoa ny vavaka iombonana ianao aorian'ny hetsika atao'ny vondrona ny Sabata tolakandro.
  - Ny mpitarika ny fivoriana dia tokony hamaky manontolo ny taratasy fanaovana ny hetsika, hanangona izay fitaovana ilaina, hitady mpiara-miasa an-tsitraro fanampiny na mpitarika momba ny hira sy mozika raha ilaina, ary hivavaka ho an'ny fitarihan'ny ny Fanahy Masina.

- Manaova dika vita printy an'ireo fitaovana hafa momba ny Andro Fiaraha-mivavaka raha ilaina:
  - Fiarahabana Tongasoa ary Soso-kevitra momba ny drafitra (ho an'ny mpitarika)
  - Teny Fikasana Momba ny Vavaka (Taratasy ho an'ny mpandray anjara)

### Tahirin-kevitra Fanampiny

- Tranon-kalan'ny *Revival and Reformation*. Jereo ao amin'ny faritra Vavaka raha mila hevitra tsara indrindra avy amin'ny ministeran'ny vavaka. Ho hitanao ao ny Tahirin-kevitra rehetra momba ny Andro Fiaraha-mivavaka Taona 2022 sy ny taona teo aloha : <https://www.revivalandreformation.org/resources/all/prayer-and-fasting-days>
- *Praying for Rain* (Mivavaka ho an'ny Ranonorana). Io boky kely io dia azo alaina amin'ny aterneto, feno teny notsongaina sy tari-dàlana momba ny fitarihana vavaka iombonana : <https://www.revivalandreformation.org/resources/all/praying-for-rain>
- *Experiencing God Through Prayer and Praise (Manao Fanandramana Miaraka amin'Andriamanitra amin'ny alalan'ny Vavaka sy Fiderana)* . Io boky io , izay azo alaina amin'ny aterneto, dia ahitana tahirin-kevitra mahagaga for an'ny vavaka ataon'ny tena manokana sy miaraka amin'ny vondrona. Ataovy printy ny loha-hevitra ilainao manokana na ny boky manontolo: . <https://www.revivalandreformation.org/prayer/experiencinggod>
- “*ThreeAngels.info*”. Raha te-handalina bebe kokoa momba ny hafam-pitiavan'ny andro farany avy amin'Andriamanitra ianao, dia efa namorona ity sita manokana ity ny Fiangonana Advantista Mitandrina ny Andro Fahafito, miaraka amin'ny video, boky sy zavatra maro hafa koa: <https://www.threeangels.info>

## **Asaina Ianao: Miaraha Amin'ny Andro Fiaraha-mivavaka Isan-telovolana amin'ny 2022!**

Asaina ianao hiaraka amin'ireo mpino maneran-tany amin'ny andro manokana Fiaraha-mivavaka isaky ny Sabata voalohany amin'ny telovolana

- Amin'ity taona ity isika dia mivavaka amin'ny alalan'ny hafatra ara-potoan'ny anjely telo ao amin'ny Apokalypsy 14.
- Raha efa mankalaza ny Andro Fiaraha-mivavaka isan-telo volana ny fiangonanao, dia miomàna hanatrika izany sy asao ny namanao. Raha tsy izany, dia miresaha amin'ny pasitora na ny komitim-piangonana momba ny fandraisana anjara amin'ny Andro Fiaraha-mivavaka amin'ity taona ity. Azo atao ihany koa ny mandray anjara isam-pianakaviana, ao anatin'ny vondrona kely, na ianao samirery.
- Jereo ny fitaovana momba ny Andro Fiaraha-mivavaka ary tahirin-kevitra hafa ao amin'ny tranokalan'ny Fifohazana sy ny Fanavaozana ao amin'ny tabilao ambany: <https://www.revivalandreformation.org>
- Ireo hetsika momba ny vavaka dia natao indrindra ho an'ny vondrona maro samihafa. Tianay ny hampirisika ny olon-drehetra hiara-mivavaka: zanaka sy ray aman-dreny, zatovo sy misotro ronono, mpitovo sy mpivady, kristiana nandritra ny androm-piainany sy olona liana mpikatsaka zava-baovao fotsiny. Raha toa tsy mbola nanatrika fotoam-bavaka toy izany ianao teo aloha dia izao no fotoana mety ho anao !

Na manao ahoana na manao ahoana ny halehiben'ny fihaikana atrehinao, dia lehibe lavitra noho izany ny Andriamanitsika! Ao anatin'ny taona feno fahaverezan-javatra maro sy alahelo, dia manome fanantenana mihoatra noho izay eritreretintsika Izy: *"Koa aoka isika hanatona ny seza fiandrianan'ny fahasoavana amin'ny fahasahiana, mba hahazoantsika famindram-po sy hahitantsika fahasoavana ho famonjena amin'ny andro mahory."* ( Heb. 4:16 ). Andao hiarahivavaka amin'ity taona ity

### **Nahoana No Mivavaka Araka Ny Hafatry Ny Anjely Telo?**

Mety efa hainao tsianjery ny hafatry ny anjely telo ao amin'ny Apokalypsy 14: 6-12. Ireo no hafam-pitiavana farany avy amin'Andriamanitra ho an'izao tontolo izao, kanefa mahagaga fa mbola maro ny Advantista no tsy mahay manazava ny antony maha-zava-dehibe ireo hafatra ireo.

- Mifanaraka amin'ny inona amin'ny sary lehiben'ny famonjena ireo hafatry ny anjely telo ireo?

- Inona no ambarany momba ny fitiavan'Andriamanitra?
- Inona no fiantraikan'izy ireo eo amin'ny fiainako, ary amin'ny fomba ahoana no ahafahako mizara izany amin'izao tontolo izao?

Ny mivavaka araka ny Soratra Masina dia manome heviny ny vavaka ataontsika ary mamela an'Andriamanitra hiteny mivantana amin'ny alalan'ny Teniny. Manantena izahay fa ny Andro Fiaraha-mivavaka isan-telovolana amin'ny taona 2022 dia hitarika anao hivavaka an-kitsim-po sy amin'ny tanjona mazava ary hanome tsirin-kevitra anao handalina bebe kokoa ireo hafatra ara-paminaniana.

## **Koa Inona Ary No Tena Ambaran'Ireo Hafatra Ireo?**

Voalohany, vakio ny Apokalypsy 14:6-12 amin'ny dikan-tenin'ny Baiboly mafy orina. Mety ho sahiran-tsaina ianao amin'ny voalohany satria misy sosona maro ny hevitra miafina ao ambany. Ahoana ny fomba hamakiana ny *code* na teny miafina? Atombohy amin'ny fandalinana ombam-bavaka mafana ny Baiboly manontolo satria mirakitra izany dia mirakitra ny zavatra rehetra ilainao mba hahatakaranao ny bokin'ny Apokalypsy. Iangavio ny pasitoranao hanao seminera momba ny Apokalypsy na hanolotra fitaovana hanaovana fianarana tsara izay mamela ny Baiboly hanazava ny tenany.

Ity misy famintinana tena tsotsotra hanampy anao hanomboka izany:

- Anjely 1:** Miankohofa amin'i Jesosy amin'ny maha-Mpamonjy sy Mpamorona antsika Azy amin'izao androm-pitsarana izao.
- Anjely 2:** Manaraha an'i Jesosy amin'ny alalan'ny Teniny ary aza mety hofitahina.
- Anjely 3:** Manana safidy ianao: hanaraka an'i Kristy na Satana. Manàna finoana an'i Kristy FAHAMARINANAO

## Mivavaka Araka Ny Hafatry Ny Anjely Faharoa: Fivoriana 1

**Fotoana:** Fotoam-pivavahana Zoma maraina any amin'ny sekolim-piangonana na fivoriana ny tanora na hetsika hafa

**Lohahevitra:** Mivavaka amin'Andriamanitra mendri-pitokisana

### Mifandray:

- Omeo taratasy kely sy penina na pensilihazo ny olona tsirairay.
- Iangavio ny tsirairay hanoratra fahamarinana tsara iray momba ny tenany izay mety tsy ho fantatry ny olona ao amin'ny vondrona. Ohatra: Mahay mihanika amin'ny harambato aho. Na nipetraka tany amin'ny firenena telo samihafa aho.
- Angony ireo taratasy ary vakio mafy izany, ary asao ny rehetra hamantatra hoe iza no nanoratra ny fanambarana tsirairay. Aorian'ny faminavina vitsivitsy dia asaivo mitsangana ilay olona marina.
- Hazavao: Afaka mianatra bebe kokoa momba ny olona iray isika, eny fa na dia ireo namantsika sy fianakaviana akaiky indrindra aza. Tian'i Jesosy hahafantatra AZY bebe kokoa isika. Tsy tiany ho very hevitra isika momba ny toetrany be fitiavana sy ny fitiavany mahagaga!

### Mamantatra

- Iaraho mamaky ny Genesisy 11:1-9.
- Anontanio: Inona no lazain'ity tantara ity amintsika momba ny fahalianan' Andriamanitra ny amin'ny zavatra ataon'ny olona? Inona no ambaran'izany amintsika momba ny heriny?
- Ifanakalozana hevitra: Inona no dikan'ny hoe *Babela* ? (“fikorontanana”)
- Anontanio: Inona no hevitra nampisavorovoro nampidirin'ireo mpanorina ny Tilikambon'i Babela?

Ellen G. White ao amin'ny boky *Patriarka sy Mpaminany* (p. 107-108) dia manome ireto hevitra manaraka ireto. Vakio fohifohy na avereno vakiana ny heviny (na angataho ireo mpianatra efa zokinjokiny mba hamaky ny p. 107-108 ao amin'ilay boky ary hanolotra hevi-dehibe).

o “Tsy nino ny fanekena nataon'Andriamanitra ny mponina teo amin'ny lemak'i Sinara fa tsy hahatonga safo-drano amin'ny tany intsony Izy.”



o “Maro tamin’izy ireo no nandà ny fisian’Andriamanitra ary nilaza fa ny Safodrano dia zavatra voajanahary.”

o “Ny tanjona iray teo anoloan’izy ireo tamin’ny fananganana ilay tilikambo dia ny ho fiarovana ny tenany raha sendra misy safo-drano hafa. Tamin’ny fananganana rafitra avo noho ny haavon’ny ranon’ny safo-drano, dia nihevitra izy ireo ny hametraka ny tenany ankoatran’izay mety hitera-doza.”

o “Ny asa rehetra dia natao mba hanandratana bebe kokoa ny reharen’ireo mpanorina azy sy hampiala ny sain’ny taranaka ho avy hiala amin’ Andriamanitra ka hitarika azy ireo ho amin’ny fanompoan-tsampy.”

- Manao hira iray milaza fa mahagaga Andriamanitra.

### **Mivavaka**

- Misaotra an’Andriamanitra fa Andriamanitry ny zavatra azo antoka Izy fa tsy ny zavatra mahavery hevitra na ny fikorontanana.

- Misaotra an’Andriamanitra noho ny fomba itondrany filaminana eo amin’ny fiainanao.

- Manao hira andininy iray ny amin’ny fomba ahafahanao matoky an’Andriamanitra.

### **Mampihatra**

- Manangana ekipa misy olona roa na telo izay hifampizara ny fomba tiany hanesoran’ Andriamanitra ny fisavoritahana eo amin’ny fiainany. Mivavaka ho an’ny filan’ny tsirairay.

- Manao hira andininy iray ny amin’ny fomba iarahan’Andriamanitra amintsika mandrakariva.

## **Mivavaka Araka Ny Hafatry Ny Anjely Faharoa: Fivoriana 2**

**Fotoana:** Fotoam-pivavahan'ny mpianakavy na zoma alina miaraka amin'ny namana ao an-trano na any ivelany

**Lohahevitra:** Andriamanitra tsy levona mandrakizay!

### **Mifandray :**

- Mipetraha miaraka amin'ny fianakavianao na vondrona ao anaty faribolana.
- Asao ny rehetra hieritreritra lalàna iray eo amin'ny zavaboary izay hitanao fa tsy mbola nodikaina. Avy eo ny olona tsirairay dia maneho fohifohy ny lalàn'ny natiora iray izay tsy miova mihitsy. Mety mila namana ny ankizy kely. Ohatra: Makà zavatra iray ary avelao hilatsaka. Ny zavatra dia mianjera midina fa tsy miakatra.
- Asao ny tsirairay mba hamantatra hoe inona no lalàna voajanahary efa lany andro.
- Hazavao: Ny olombelona dia mamorona zavatra maro izay toa tsy mety ho simba (tsangambato, milina, sns), nefa ny zavatra rehetra amboarin'ny olombelona dia rava na mirodana. Andriamanitra irery ihany no tsy mirodana na miova.
- Ny tantara dia miresaka momba ny lehilahy iray izay nanorina tanàna sy firenena iray izay noheveriny fa haharitra mandrakizay. Nahita anefa izy fa Andriamanitra irery ihany no tsy miova.

### **Mamantatra**

- Miara-mamaky ny Daniela 4:29-33.
- Anontanio hoe: Inona no noeritreretin'i Nebokadnezara Mpanjaka momba ny tenany sy ny tanànany lehibe tao Babylona? Inona no nolazain'Andriamanitra? Ary inona no vokatry ny avonavony?
- Miara-mamaky ny Daniela 4:34-37.
- Miara-mamintina: Inona no fijoroana ho vavolombelona nananan'i Nebokadnezara rehefa avy nanetry tena izy?

### **Mivavaka**

- Avelao hisokatra eo amin'ny Daniela 4:34-37 ny Baibolinao. Miderà an'Andriamanitra noho ireo toetra voalaza ao amin'ny andininy tsirairay.

Ohatra avy ao amin'ny Daniela 4:34

*Ianao no Andriamanitra Avo Indrindra. Tsy misy ambony noho Ianao ety an-tany!  
Velona mandrakizay Hianao, Andriamanitra ô. Tsy ho faty mihitsy ianao!*

## **Mampihatra**

- Miresaka ny amin'ny fomba ahafahana mampihatra ny fiderana an'Andriamanitra isan'andro noho ny toetrany masina. Azonao atao ny manomboka fomba vaovao ho an'ny fianakaviana hiderana an'Andriamanitra amin'ny zavatra manokana mandritra ny fotoam-pivavahana maraina na hariva. Makà aingam-panahy avy amin'ny tenin'ny Soratra Masina na ny fitahian'Andriamanitra eo amin'ny fiainanao andavanandro.

Ohatra:

*Andriamanitra Ray ô, manapaka ny zavatra rehetra!  
Andriamanitra Zanaka ô, tsy miova Ianao!  
Andriamanitra Fanahy Masina ô, mahery sy be fitiavana Ianao!*

## Mivavaka Araka Ny Hafatry Ny Anjely Faharoa: Fotoana 3

**Fotoana:** Fotoam-bavaka manokana/fianakaviana amin'ny Sabata maraina

**Lohahevitra:** Mijery an'Andriamanitra fa tsy ny olona

### Mifandray

- Anontanio: Afaka mieritreritra fotoana iray ve ianao izay tsy nahombizan'ny zavatra nataon'olombelona taminao? Raha manao fanompoam-pivavahana miaraka amin'ny ankizy ianao, dia iangavio izy ireo hanao ny sarin'ny zavatra noforonin'olombelona izay tsy nety tsara. Fantaro izay asehon'ilay sary. Ohatra: sarin'ny kilalao vaovao anankiray izay mora tapaka na simba.
- Andeha hijery fahamarinana momba an'Andriamanitra sy ny antony ahazoantsika miantehitra Aminy mandrakariva.

### Mamantatra

- Miara-mamaky ny Apokalypsy 14:8. Nanambara ny anjely faharoa fa rava i Babylona. Eritrereto ny tsy fitovian'ny toetran'Andriamanitra amin'ny an'i Babylona - ary ny tsy haharava na hampirodana velively ny fanjakany.
- Jereo ireto andinin-tSoratra Masina ireto mba hikorohana bebe kokoa ny toetran'Andriamanitra sy ny antony azo itokiana Azy mandrakariva:
  - o Isaia 40:28
  - o Salamo 90:2
  - o Salamo 106:2
  - o Romana 1:20

### Mivavaka

- Vakio indray ireo andalana etsy ambony. Miderà an'Andriamanitra noho ny zavatra hitanao momba Azy isaky ny andinin-teny.  
Ohatra: *Tompo ô, mihelina ihany ny ankamaroan'ny zavatra eto amin'ity tontolo ity. Misaotra Anao fa maharitra mandrakizay Ianao!*

### Mampihatra

- Tohizo ny fanaovana fiderana ho ampahany tsy tapaka amin'ny fivavahanao manokana. Manaova fanazaran-tena midera an'Andriamanitra amin'ny zavatra manokana isan'andro.  
Ohatra:  
*Andriamanitra ô, Ianao no Mpanome ny fanomezana tsara rehetra.  
Ianao no Voalohany sy Farany.  
Ianao no Mpamorona ny lanitra sy ny tany.*

## **Mivavaka Araka Ny Hafatry Ny Anjely Faharoa: Fotoana 4**

**Fotoana:** Fotoam-pivavahana Sabata maraina

**Lohahevitra:** Ny “mandrakizay” an’ny olombelona dia tsy mifanaraka amin’ny “mandrakizay” an’Andriamanitra

### **Soso-kevitra momba ny drafitra:**

Arindrao miaraka amin'ny pasitora na ny loholona ny fotoam-pivavahana. Ampidiro ireo fizarana ilaina amin'ny fandaharam-potoanan’ny fanompoam-pivavahana mahazatra, toy ny fiarahabana sy ny fanatitra. Mariho fa ny vakiteny fototra sy ny hira dia tafiditra ao anatin’io soso-kevitra momba ny fanompoam-pivavahana io. Mivavaha ho an’ny fomba ahafahanao manao ilay fandaharana manokana sy mampiditra ny sokajin-taona rehetra amin'ny fanompoam-pivavahana. Tsarovy ihany koa ny manasa ny rehetra hanatrika ny fotoambavaka tolakandro, ary ampirisiho ny mambra hitondra namana.

Alohan’ny Andro Fiaraha-mivavaka, dia manaova fandaminana ho an’ny mpilatsaka antsitrapo hanampy amin’ny famakiana mafy ireo andalan-tSoratra Masina. Omano koa ny “Fahamarinana Tsy Mety Lany Andro Momba An’i Jesosy” voatanisa ao amin’ny fizarana hita etsy ambany. Soraty eny amin’ny afisy lehibe izany (angamba ny ankizy na ny tanora dia afaka manampy anao hanoratra sy handravaka ireo afisy). Raha toa ka tsy azo atao izany dia ataovy lisitra eo amin’ny solaitrabe lehibe iray ireo fahamarinana ireo mba hovakian’ny rehetra. **Ity fanompoam-pivavahana ity dia azo tarihin’ny mpiandraikitra iray izay mijoro eny aloha mba hametraka fanontaniana momba ny fifanakalozan-kevitra, hanazava fohifohy ireo andalan-tSoratra Masina, hanome toro-làlana, ary hanambara ny hira hatao. Ireo tanora na mpilatsaka antsitrapo hafa dia afaka mipetraka eo amin’ny laharana voalohany na eo anilan’ny mpitarika mba ho vonona hamaky ireo andinin-tSoratra Masina, hitarika hira, na hanampy amin’ny fomba hafa.**

### **Mihira**

- Manao hira fiderana ho an’Ilay Andriamanitsika mahery.
- Hiran’ny ankizy momba ny herin’Andriamanitra sy ny fahefany.

### **Mivavaka**

- Iangavio ny tsirairay mba hamorona vondrona misy olona telo na efatra. Mifidiana mpanampy vitsivitsy mialoha ny fotoana hiarahaka amin'ny olona mipetraka irery ary ataovy azo antoka fa manana vondrona ny tsirairay.

- Iangavio ny tsirairay mba hanao vavaka fisaorana fohy miaraka amin'ny vondrona misy azy. Misaotra an'Andriamanitra noho ireo ohatra manokana momba ny heriny teo amin'ny fiainanao.

## Mifandray

- Iangavio ny tsirairay mba hijanona ao amin'ny vondrona misy azy izay misy olona telo na efatra. Zarako ao amin'ny vondrona misy anao ny momba ny zava-nitranga iray teo amin'ny fiainanao izay toa haharitra “mandrakizay”.
- Hazavao: Misy zavatra sasany eo amin'ny fiainana izay toa haharitra mandrakizay, nefa milaza amintsika ny Baiboly fa hifarana ny zava-drehetra eto amin'ity tontolo ity. Androany isika dia mandray fomba fijery vaovao ny amin'ny hafatry ny anjely faharoa ao amin'ny Apokalypsy 14:8. Hitantsika eto fa rava i Babylona. Nahoana no zava-dehibe io hafatra io?
- Hazavao: Fahiny elabe dia nisy mpanjaka iray izay nihevitra fa haharitra mandrakizay ny fanjakany. Hitany kosa ny fahamarinana ny amin'Andriamanitra mahery anankiray izay maharitra mandrakizay, rehefa rava ny fanjakana eto an-tany. Vonona ny hahita ity fahamarinana ity indray ve ianao?

## Mamantatra

- Vakio mafy: Daniela 5:1-5. (Nanombo sy nankalaza andriamanitra tsy izy nataon' olombelona i Belsazara Mpanjaka.)  
(Eritrreto ny hanendry mambra samy hafa hamaky ny andinin-tSoratra Masina tsirairay mandritra ny fotoam-pivavahana.)
- Anontanio: Inona no zavatra eto amin'ity tontolo ity izay mahasarika anao sy derainao/ankalazainao?
- Asao ny rehetra hivavaka mangina: Manaova vavaka fiaiken-keloka fohy momba ny zavatr'izao tontolo izao izay mampivily anao hihataka amin'ilay Andriamanitra velona mandrakizay.
- Vakio mafy: Daniela 5:5-9. (Nandefa hafatra ho an'ilay mpanjaka Andriamanitra izay tsy hain'iza na iza hazavaina.)
- Vakio mafy: Daniela 5:22-28. (Naniraka an'i Daniela Andriamanitra hanazava ny hafatra.)
- Hazavao: Feno lainga sy fisafotofotoana hatrany i Babylona raha ny amin'ny fahamarinana no resahina. Ireto misy fahamarinana sasany momba an'i Jesosy izay

ezahin'i Babylona ara-panahy asafotofoto amin'izao androntsika izao. (Azon'ny mpitarika atao ny mamaky mafy ireto peta-drindrana manaraka ireto :

### **Fahamarinana Tsy Mety Lany Andro Momba An'i Jesosy**

(Soraty amin'ny taratasy lehibe ireto hotazonin'ny ankizy, na aseho amin'ny fomba hafa)

- \* Jesosy no hany anarana ahazoantsika famonjena - Asan'ny Apostoly 4:10-12
- \* Jesosy no Mpisoronabentsika izay mitsangana hiaro antsika amin'izao andro fitsarana izao - Hebreo 3:1 sy 9:24
- \* Jesosy dia tsy miova tahaka ny lalàny - Hebreo 13:8 sy Matio 5:18
- \* Jesosy no Tompon'ny Sabata - Marka 2:27, 28
- \* Jesosy dia manana vahoaka izay mitandrina ny didiny sy mifikitra amin'ny mpaminany marina - Apokalypsy 12:17 sy 19:10
- \* Jesosy mamoha ny olo-marina maty rehefa miverina Izy - 1 Tes. 4:16-18
- \* Ho avy ara-bakiteny indray Jesosy! - Apokalypsy 1:7

### **Mivavaka**

- Misaotra an'Andriamanitra ny amin'ireo fahamarinana tsirairay momba an'i Jesosy ireo.
- Miaike heloka ny amin'ny fotoana nanarahan'ny vahoakan'Andriamanitra zavatra izay toa fahamarinana nefa hita fa vahaolana tsy maharitra nataon'olombelona.
- Mangataka fahendrena avy amin'Andriamanitra mba hahazana hamantatra sy hanavaka izay zavatra mandalo sy izay maharitra mandrakizay. Misaotra Azy fa hanome fahendrena ho an'izay mangataka Izy(Jakoba 1:5).

### **Mampihatra**

- Manao vondrona misy olona telo na efatra indray.
- Mifanakalo hevitra: Iza amin'ireo fahamarinana fito momba an'i Jesoa ireo no tena ilainao hianarana sy hampiharina amin'ity herinandro ho avy ity? Mifampizara ny valinteny ary mivavaka mba hahazo fahendrena sy fahatokiana.

### **Mihira**

- Manao hira iray momba ny fahamarinan'i Jesosy.

### **Mivavaka**

- Faranana amin'ny fangatahana ny Fanahy Masina hitarika ny ankizy sy ny tanora ary ny olon-dehibe hiaina ny fahamarinana mandrakizay momba an'i Jesosy.

## Mivavaka Araka Ny Hafatry Ny Anjely Faharoa: Fotoana 5

**Fotoana:** Fandaharam-bavaka ny Sabata tolakandro

**Lohahevitra:** Mifandraiso amin'izay mitsangana/mijoro fa tsy izay mianjera!

### Mifandray

- Manao vondrona misy olona roa na telo. Ataovy azo antoka fa ao anatin'ny vondrona ny tsirairay.
- Mifanakalo hevitra ao anatin'ny vondrona: Inona no toerana sarotra nialana indrindra teo amin'ny fiainanao manontolo? Nahoana?
- Mpitarika: Hazavao fa na dia ny toerana “manahirana feno zava-tsarotra” aza dia mety ho sarotra ialana.
- Ampidiro amin'izay hahazaka ny fizahan-toetry ny fotoana ny fiainanao - na dia midika aza izany hoe miala amin'ny toerana iray izay ahatsapanao aina vetivety.

### Mamantatra

- Vakio mafy: Apokalypsy 14:8 sy 18:5.
- Vakio mafy: *Hery Mifanandrina*, p. 396, 397.

Eto i Ellen White dia manazava fa ny fianjeran'i Babylona dia tsy ho tanteraka raha tsy efa:

o “Nampisotroin'i Babylona ny FIRENENA REHETRA ny divain'ny fahatezerana noho ny fijangajangany.” ( Apok. 14:8 ).

o Miasa “amin'ny hery rehetra sy ny famantarana sy ny fahagagana mandainga ary ny fitaky ny tsi-fahamarinana rehetra” i Satana ( 2 Tes. 2:9, 10 ).

o Avela « hiàsan'ny fahadisoan-kevitra mba hinoany ny lainga » ireo izay “tsy nandray ny fitiavana ny fahamarinana izay hamonjena azy” ( 2 Tes. 2:10, 11 ).

o Mandà ny fampitandremana momba ny hafatry ny anjely telo ny fiangonana voalaza ao amin'ny Apokalypsy 14:8 .

- Vakio mafy: *Raha tsy feno io fepetra io, ka tanteraka manerana ny tany kristiana rehetra ny firaisan'ny fiangonana sy izao tontolo izao, dia tsy ho feno ny faharavan'i*



*Babylona. Miandalana ny fiovana, ary mbola ho avy ny fahatanterahana fenon'ny Apokalypsy 14 :8. (Hery Mifanandrina, 396)*

- Ampitahao amin'ny fanjakan'Andriamanitra ny fanjakan'i Babylona rava, araka ny voalaza ao amin'ny Isaia 40:8 sy ny Hebreo 13:8 .
- Iangavio ny rehetra hanao sary mampiseho ny fomba iray nisehoan'Andriamanitra ho nahatoky taminao nandritra ireo taona lasa.
- Ahantona ny sary rehetra mba ho hitan'ny rehetra. (Fomba iray hanantonana ireo sary: mamelatra tady toy ny tady fanahazan-damba ary manantona sary amin'ny *pince*.)

### **Mivavaka**

- Mpitarika na mpilatsaka an-tsitrabo: Misaotra an'Andriamanitra noho ny fampitandremana antsika momba ny fianjeran'i Babylona sy ny niantsoana ny olony hiala tao Babylona.
- Miara-mihira: (*izay hira fisaorana.*  
(Manaova fiovana mora avy amin'ny vavaka mankany amin'ny hira amin'ny alalan'ny fihirana *acappella* na amin'ny fitaovana mety tsara toy ny gitara.)
- Mpitarika na mpilatsaka an-tsitrabo: Midera an'Andriamanitra fa maharitra mandrakizay Izy sy ny Teniny.
- Miara-mihira: (*izay hira momba ny Tenin'Andriamanitra*).
- Mpitarika: manasa ny mpandray anjara hiaiky heloka mangina ny amin'izay mety ho marimaritra iraisana teo amin'ny fiainany.
- Miaraha mihira: (*izay hira rehetra momba ny hery manadion'i Jesosy*.)
- Mpitarika: Mangataka amin'Andriamanitra herim-po hijoroana ho an'i Kristy.

### **Mihira**

- Manao hira momba ny fijoroana ho an'i Jesosy.

### **Mampihatra**

- Omeo karatra kely tsy misy na inona na inona ny tsirairay. Angataho ny tsirairay mba hanao sarin'ny tenany “mijoro ho an'i Jesosy.” Avy eo dia soraty eo ambanin'ny

sary ny fomba iray iantsoan'Andriamanitra anao hijoro ho Azy amin'izao fotoana izao. Ataovy ao amin'ny Baibolinao ilay karatra.

### **Mivavaka**

- Fantatsika fa tsy ho ela dia tsy hisy hahomby ny zavatra itokisan'ny olona eto amin'ity tontolo antitra ity : ny namana, ny orinasa, ny fitondram-panjakana, ny kaontim-bola amin'ny banky dia mety ho eo anio fa ho lasa rahampitso.
- Misaotra an'i Jesosy fa tsy ho levona mandrakizay Izy!

### **Asa azo isafidianana ho an'ny ankizy na tanora:**

- Manome tapaka taratasy sy fitaovana miloko mba hahafahan'ny tanora tsirairay manao sary lehibe momba ny tenany mijoro ho an'i Jesosy. Asio soratra ny sary tsirairay hoe “Mijoroa ho an'i Jesosy!” Ahantona eo amin'ny lalantsara na ny fidirana ao am-piangonana ireo sary.

## **Tari-dàlana momba ny Vavaka Iombonana**

Anisan'ny tanjona amin'ny fotoam-bavaka isan-telovolana amin'ity taona ity ny fiantsoana taranaka vaovao hivavaka. Izany no antony nampifantohana ny hetsika ho amin'ny fampivondronana ny taona rehetra hitady an'Andriamanitra eo am-pitrandrahana ny fahamarinana azo ampiharina ao amin'ny hafatry ny anjely telo. Andeha ho toroina hevitra ny tanora, hampaherezo ny manirery, ary homena toky ireo mitady ny fahamarinana eo anivontsika. Asaina amin'izany avokoa ny rehetra!

Mampirisika ihany koa izahay mba hanokanana fotoana hanaovana fotoam-bavaka iombonana lalindalina kokoa, indrindra ho an'ny olon-dehibe sy ny tanora. Hevero ny hanampy sy hanitatra fotoam-bavaka ataon'ny vondrona aorian'ny hetsika iarahan'ny sokajintaona samihafa ny Sabata tolakandro (Fotoana 5). Ny fotoana hafa mety hanaovana vavaka miitatra dia ny zoma hariva na ny Sabata maraina alohan'ny SekolynSabata.

### **Drafitra Azo Atao Ho An'ny Fotoam-Bavaka Iombonana**

**Hira:** Atombohy amin'ny hira fiderana. Aza misalasala mampifangaro hira mandritra ny fotoam-bavaka.

**Fisaorana sy Fiderana:** Misaora noho ny fitahiana manokana ary miderà an'Andriamanitra noho ny fahatsarany.

**Fiaiken-keloka:** Manokàna minitra vitsivitsy hanaovana fiaiken-keloka manokana ary misaora an'Andriamanitra noho ny famelany

**Fitarihana:** Mangataha amin'Andriamanitra mba hanome fahendrena manoloana an'ireo fanamby sy fanapahan-kevitra ankehitriny.

**Ny Fiangonanantsika:** Mangataha an'Andriamanitra mba hitahy ny ezaka ataon'ny fiangonantsika eo an-toerana sy isam-paritra ary maneran-tany

**Fangatahana ho an'ny eo an-toerana:** Mivavaha ho an'ny zavatra ilain'ny mambran'ny fiangonana sy ny fianakaviana ary ny mpiaramonina amin'izao fotoana izao.

**Mihaino ary Mamaly:** Manokàna fotoana hihainoana ny feon'Andriamanitra ary hamaliana amin'ny fiderana na hira.

**Mivavaka amin'ny alalan'ny Soratra Masina:** Ho fanampin'ny fitondrano eo amin'Andriamanitra ny fangatahanao dia makà fotoana hivavahana araka ny tenin'ny Soratra Masina. Takio ny teny fikasan'Andriamanitra ary mamalia amin'ny fiderana sy

fisaorana. Mety haniry hivavaka amin'ny alalan'ireo hafatry ny anjely telo ireo ny vondrona misy anao, mangataka amin' Andriamanitra ny fahatakarana sy fahendrena lalindalina kokoa amin'ny fizarana fahamarinana amin'izao tontolo izao. Ny safidy iray hafa koa dia ny fiarahana mivavaka amin'ny alalan'ny salamo fiderana.

**Safidy ho an'ny Sakafo :** Ny fiangonana sasany dia mamarana ny Andro Fiaraha-mivavaka amin'ny sakafo hariva tsotra amin'ny fankalazana ny fitahian' Andriamanitra.

Raha mila tari-dàlana fanampiny momba ny fitarihana ny vavaka iombonana, dia alaivo ao amin'ny aterneto ilay bokikely *Praying for Raina* (Mivavaka ho an'ny Ranonorana) avy amin'ny tranokalan'ny *Revival and Reformation* :

<https://www.revivalandreformation.org/resources/all/praying>

## **Teny Fikasan'ny Baiboly Ho Takiana Ao Amin'ny Vavaka**

### **Teny Fikasana Momba ny Fanahy Masina**

“Mangataha ranonorana amin'i Jehovah ianareo amin'ny andro fara-orana. Dia amin'i Jehovah Izay manao ny helatra; ranonorana mivatravatra no homeny azy. Eny, samy homeny ny zava-maitso any an-tsaha ireny.” Zak. 10:1

“Koa raha ianareo, na dia ratsy aza, mahalala hanome zava-tsoa ho an'ny zanakareo, tsy mainka va ny Ray, Izay any an-danitra, no hanome ny Fanahy Masina ho an'izay mangataka aminy?” Lioka 11:13

“Fa ny Mpananatra, dia ny Fanahy Masina, Izay hirahin'ny Ray amin'ny anarako, Izy no hampianatra anareo ny zavatra rehetra sy hampahatsiaro anareo izay nolazaiko taminareo. . . . Ary raha tonga Izy, dia hampiaiky izao tontolo izao ny amin'ny fahotana sy ny fahamarinana ary ny fitsarana”. Jaona 14:26; 16:8

“Lazaiko aminareo marina dia marina tokoa, izay mino Ahy, ny asa ataoko no hataony koa; ary hanao asa lehibe noho izany aza izy, satria Izaho mankany amin'ny Ray. Ary na inona na inona no hangatahinareo amin'ny anarako, dia hataoko izany, mba hankalazana ny Ray amin'ny Zanaka. Raha mangataka zavatra amin'ny anarako ianareo, dia hataoko izany” Jaona 14:12-14

“Dia namaly izy ka nanao tamiko hoe: Iza no tenin'i Jehovah amin'i Zerobabela: ‘Tsy amin-kery na amim-pahatanjahana, fa amin'ny Fanahiko, hoy Jehovah Tompon'ny maro.’” Zak. 4:6

### **Teny Fikasana Fa Mamaly Vavaka Andriamanitra**

“Raha miray Amiko ianareo, ka mitoetra ao anatinareo ny teniko, dia angataho izay tianareo na inona na inona fa ho tonga aminareo izany.” Jaona 15:7

“Koa aoka isika hanatona ny seza fiandrianan'ny fahasoavana amin'ny fahasahiana, mba hahazoantsika famindram-po sy hahitantsika fahasoavana ho famonjena amin'izay andro mahory.” Heb. 4:16

“Koa lazaiko aminareo, na inona na inona tononinareo amin'ny fivavahana sy angatahinareo, dia minoa fa efa nandray ianareo, dia ho azonareo izany.” Marka 11:24

“Antsoy Aho amin'ny andro fahoriana, dia hamonjy anao Aho, ka hanome voninahitra Ahy ianao.” Sal. 50:15

“Ary lazaiko aminareo koa, raha misy roa aminareo mifanaiky ety ambonin'ny tany na amin'inona na amin'inona ka hangataka izany, dia ho azony avy amin'ny Raiko Izay any an-danitra izany.” Mat. 18:19

"Ary na inona na inona no angatahinareo amin'ny fivavahana atao amin'ny finoana, dia ho azonareo." Mat. 21:22

“Ary na inona na inona no hangatahinareo amin'ny anarako, dia hataoko izany, mba hankalazana ny Ray eo amin'ny Zanaka. Raha mangataka zavatra amin'ny anarako ianareo dia hataoko izany.” Jaona 14:13, 14

“Ary amin'izany andro izany dia tsy hanontany Ahy na inona na inona ianareo; lazaiko aminareo marina dia marina tokoa fa na inona na inona hangatahinareo amin'ny Ray amin'ny anarako, dia homeny anareo amin'ny anarako izany. Mandraka ankehitriny dia tsy mbola nangataka na inona na inona tamin'ny anarako ianareo ; mangataka, dia hahazo ianareo mba ho tanteraka ny fifalianareo.” Jaona 16:23, 24

“Ary izao no fahasahiana ananantsika eo anatrehan'ny: Raha mangataka zavatra araka ny sitrapony isika, dia mihaino antsika Izy. Ary raha fantatsika fa mihaino antsika Izy, na inona na inona no angatahintsika, dia fantatsika fa azontsika izay angatahintsika Aminy.” 1 Jao. 5:14, 15

### **Teny Fikasana Momba ny Herin'Andriamanitra**

“Fa moa misy zavatra mahagaga izay tsy hain'i Jehovah va? Amin'ny fotoan'andro raha avy ny taona toy izao dia hiverina aminao Aho, ary Saraha hanana zazalahy.” Gen. 18:14

“Jehovah hiady ho anareo, fa ianareo kosa hangina.” Eks. 14:14

“Fa Jesosy nijery azy ka nanao hoe: Raha amin'ny olona dia zavatra tsy hainy izany; fa tsy mba tahaka izany amin'Andriamanitra; fa ny zavatra rehetra dia hain'Andriamanitra.” Marka 10:27

“Fa mahatoky Izay miantso anareo, sady Izy ihany no hanefa izany.” 1 Tes. 5:24

“Fantatro fa hainao avokoa ny zavatra rehetra, ary tsy azo ferana ny fisainanao ”. Joba 42:2

“Inona ary no holazaintsika ny amin'izany zavatra izany? Raha Andriamanitra momba antsika, iza no hahatohitra antsika? Izay tsy niaro ny Zanani-lahy, fa natolony hamonjy antsika rehetra Izy, tsy homeny miaraka aminy maimaimpoana koa va ny zavatra rehetra?” Rom. 8:31, 32

“Andriamanitra tsy mba olona ka handainga, na zanak'olombena ka hanenina; moa efa nilaza va Izy, ka tsy hefainy? na efa niteny va Izy, ka tsy hotoviny? » Nom. 23:19

“Tsy fantatrao va? Tsy efa renao va fa Andriamanitra mandrakizay Jehovah, Izay namorona ny faran'ny tany? Tsy mba mety ho reraka na sasatra Izy; tsy takatry ny saina ny fahalalany. Mampahatanjaka ny reraka Izy, ary izay kely hery dia homeny hery be. Na dia ny tanora fanahy aza dia ho reraka sy ho sasatra, ary na dia ny zatovo aza dia ho tafintohina mafy; fa izay miandry an'i Jehovah dia mandroso hery kosa; elatra no hiakarany tahaka ny voromahery; hihazakazaka izy nefa tsy ho sasatra, handeha izy nefa tsy ho reraka.” Isa. 40:28-31

### **Teny Fikasana Momba Ny fitarihan'Andriamanitra**

“Tsy efa nandidy va Aho? Koa mahereza sy matanjaha; aza matahotra na mivadi-po, fa momba anao Jehovah Andriamanitrao amin'izay rehetra alehanao.” Jos. 1:9

“Ary indro, Izaho momba anao ka hiaro anao amin'izay lalan-kalehanao rehetra ary hampody anao indray ho amin'ity tany ity; fa tsy handao anao Aho mandra-panaoko izay voalazako taminao.” Gen. 28:15

"Indro, Izaho maniraka Anjely eo alohanao hiaro anao any an-dalana sy hitondra anao ho any amin'ny fitoerana izay namboariko." Eks. 23:20

“Any ianao no hitady an'i Jehovah Andriamanitrao ka hahita Azy raha mitady Azy amin'ny fonao rehetra sy ny fanahinao rehetra.” Deot. 4:29

"Antsoy Aho, dia hovaliako ianao ka hampisehoako zavatra lehibe sy saro-pantarina izay tsy fantatrao." Jer. 33:3

“Aoka hasandratra ny lohasaha rehetra, aoka haetry ny tendrombohitra sy ny havoana rehetra; aoka ny be havoana ho tonga lembalemba, ary ny tany saro-dalana ho tonga lemaka; dia hiseho ny voninahitr'i Jehovah, ary ny nofo rehetra hiara-mahita izany; fa ny vavan'i Jehovah no efa niteny.” Isa. 40:4, 5

“Hanome saina anao sy hampianatra anao izay lalan-kalehanao Aho; hitsinjo anao ny masoko ka hanolo-tsaina anao Aho.” Sal. 32:8

"Ary Jehovah no mandeha eo alohanao; ary Izy no hiaraka aminao; tsy handao anao na hahafoy anao Izy; koa aza matahotra na mivadi-po ianao. » Deot. 31:8

"Iza no lehilahy matahotra an'i Jehovah ? Izy no hampianariny izay lalana tokony hofidiny." Sal. 25:12

"Matokia an'i Jehovah amin'ny fonao rehetra miankina amin'ny fahalalanao; maneke Azy amin'ny alehanao rehetra, fa Izy handamina ny lalanao." Ohab. 3:5, 6

"Ary afoinao ho an'ny noana izay hanina tianao ka mahavoky ny ory ianao, dia hiposaka ao amin'ny maizina ny fahazavanao, ary ny aizim-pitonao ho tahaka ny mitataovovonana. Ary Jehovah hitari-dalana anao mandrakariva sady hahavoky ny fanahinao ao amin'ny tany karankaina aza sy hampahatanjaka ny taolanao; dia ho tahaka ny saha vonton-drano ianao sy ho tahaka ny loharano miboiboika izay tsy mety ritra." Isa. 58:10, 11

"Raha tsy mbola miantso aza izy, dia hamaly Aho; ary raha mbola miteny izy, dia hihaino Aho." Isa. 65:24

### **Teny Fikasana Ho An'ny Fiovam-Po**

"Ary homeko fo hahalalany Ahy ho Jehovah izy, dia ho oloko izy, ary Izaho kosa ho Andriamaniny, fa hiverina amiko amin'ny fony rehetra izy". Jer. 24:7

"Dia hoforan'i Jehovah Andriamanitrao ny fonao sy ny fon'ny taranakao hitiavanao an'i Jehovah Andriamanitrao amin'ny fonao rehetra sy ny fanahinao rehetra, mba ho velona ianao". Deot. 30:6

"Homeko fo vaovao ianareo, ary fanahy vaovao no hataoko ao anatinareo; ary hesoriko amin'ny nofonareo ny fo vato ka homeko fo nofo ianao." Ezek. 36:26

"Ary matoky indrindra aho, fa Izay nanomboka asa tsara ao anatinareo no hahatanteraka izany mandra-pihavin'ny andron'ny Jesosy Kristy." Fil. 1:6

"Koa raha misy olona ao amin'i Kristy, dia olom-baovao izy; efa lasa ny zavatra taloha, indreo, efa tonga vaovao ireo." 2 Kor. 5:17

"Voahombo miaraka amin'i Kristy amin'ny hazo fijaliana aho; ary tsy izaho intsony no velona, fa Kristy no velona ato anatiko; fa izay ivelomako ankehitriny eo amin'ny nofo dia ivelomako amin'ny finoana ny Zanak'Andriamanitra, Izay efa tia ahy ka nanolotra ny tenany hamonjy ahy." Gal. 2:20

"Ary Andriamanitry ny fiadanana anie hahamasina anareo samy ho tanteraka; ka aoka harovana avokoa ny fanahinareo sy ny ainareo ary ny tenanareo ho tanteraka ka tsy hanan-tsiny amin'ny fihavian'i Jesosy Kristy Tompontsika. Mahatoky Izay miantso anareo, sady Izy ihany no hanefa izany." 1 Tes. 5:23, 24



## **Teny Fikasana momba ny Famelan-keloka**

“Raha ny oloko izay nantsoina amin’ny anarako ho avy hanetry tena ka hivavaka sy hitady ny tavako, ary hiala amin’ny ratsy fanaony, dia hihaino any an-danitra Aho ka hamela ny helony ary hahasitrana ny taniny. 2 Tan. 7:14

“Fa Ianao, Tompo ô, no tsara sady mamela heloka ary be famindram-po amin’izay rehetra miantso Anao.” Sal. 86: 5

“Ary raha mitsangana mivavaka ianareo ka misy olona anananareo alahelo, dia mamelà ny helony, mba havelan’ny Rainareo Izay any an-danitra kosa ny helokareo.” Marka 11:25

“Ary aoka samy halemy fanahy amin’ny namany avy hianareo, ka hifampiantra sy hifamela heloka, tahaka ny namelan’Andriamanitra ny helokareo ao amin’i Kristy.” Efes. 4:32

“Raha miaiky ny fahotantsika isika, dia mahatoky sy marina Izy ka mamela ny fahotantsika sy manadio antsika ho afaka amin’ny tsy fahamarinana rehetra”. 1 Jaona 1:9

“Avia àry hifandahatra isika, hoy Jehovah; na dia tahaka ny jaky aza ny fahotanareo, dia ho ho fotsy tahaka ny oram-panala; na dia mangatrakatraka tahaka ny sily aza, dia ho tahaka ny volon'ondry fotsy.” Isa. 1:18

“Izaho dia Izaho no mamono ny fahadisoanao noho ny amin’ny tenako; ary tsy hotsarovako ny fahotanao.” Isa. 43:25

“Fa havelako ny helony, ary tsy ho tarovako intsony ny fahotany.” Jer. 31:34

“Izy no ananantsika fanavotana amin’ny rany, dia ny famelana ny fahotantsika, araka ny haren’ny fahasoavany.” Efes. 1:7

## **Teny Fikasana Momba ny Fandresena ny Ota**

“Fa izay rehetra naterak'Andriamanitra dia maharesy izao tontolo izao. Ary ity ny fandresena izay naharesy izao tontolo izao dia ny finoantsika.” 1 Jaona 5:4

“Kanefa amin’izany rehetra izany dia manotra noho ny mpandresy isika amin’ny alalan’Ilay tia antsika.” Rom. 8:37

“Fa isaorana anie Andriamanitra, Izay manome antsika ny fandresena amin’ny alalan’i Jesosy Kristy Tompontosika”. 1 Kor. 15:57

“Aza matahotra, fa momba anao Aho; ary aza miherikerika foana, fa Izaho no Andriamanitrao. Mampahery anao Aho, sady mamonjy anao; eny, mitantana anao amin’ny tànana ankavanan’ny fahamarinako Aho.” Isa. 41:10

“Ary ho fanampin’izany rehetra izany, dia tano ny finoana ho ampinga, izay hahazoanareo hamono ny zana-tsipika mirehitra rehetra alefan’ily ratsy.” Efes. 6:16

“Voahombo niaraka amin’i Kristy amin’ny hazo fijaliana aho; ary tsy izaho intsony no velona, fa Kristy no velona ato anatiko; fa izay ivelomako ankehitriny eo amin’ny nofo dia ivelomako amin’ny finoana ny Zanak’Andriamanitra, Izay efa tia ahy ka nanolotra ny tenany hamonjy ahy.” Gal. 2:20

“Fa Andriamanitra no miasa ao anatinareo na ny fikasana na ny fanaovana hahatanteraka ny sitrapony.” Filip. 2:13

“Fa hoy izaho: Mandehana araka ny Fanahy, dia tsy hahatanteraka ny filan’ny nofo hianareo”. Gal. 5:16

“Fa Andriamanitry ny fiadanana hanorotoro an’i Satana faingana eo ambanin’ny tongotrareo. Ho aminareo anie ny fahasovan’i Jesosy Kristy Tompontosika .” Rom. 16:20

“Ary aza manaraka ny fanaon’izao tontolo izao; fa miova amin’ny fanavaozana ny saina, hamantaranareo ny sitrapon’Andriamanitra, dia izay tsara sady ankasitrahana no marina”. Rom. 12:2

“Aza tia izao tontolo izao na izay zavatra eo amin’izao tontolo izao. Raha misy tia izao tontolo izao, dia tsy ao anatin’ny fitiavana ny Ray. 1 Jaona 2:15

### **Teny Fikasana Momba ny Fanasitranana**

“Raha hazoto hihaino ny feon’i Jehovah Andriamanitrao ianao ka hanao izay mahitsy eo imasony sy hihaino lalàny ary hitandrina ny didiny rehetra, dia tsy hisy hataoko aminao ireny aretina rehetra ireny, izay nataoko tamin’ny Egyptiana; fa Izaho no Jehovah Izay manasitrana anao.” Eks. 15:26

“Ho vy sy varahina ny hidinao; ary hifamatra amin’ny andronao ny fiadananao .” Deot. 33:25

“Misaora an’i Jehovah , ry fanahiko, ary aza misy hadinoinao ny fitahiany rehetra: Izay mamela ny helokao rehetra, Izay manasitrana ny aretinao rehetra, Izay manavotra ny ainao tsy hidina any an-davaka, Izay manarona famindram-po sy fiantrana anao, Izay mahavoky soa ny vavanao; ny fahatanoranao mody indray toy ny an’ny voromahery”. Sal. 103:2-5

“Aza manao anao ho hendry; matahora an’i Jehovah ka mifadia ny ratsy, dia ho famelombelomana ny nofonao izany sy ho fanamandoanan ny taolanao.” Ohab. 3:7, 8

“Natao tsinontsinona sy nolavin’ny olona Izy; lehilahy ory sady zatra ny fahoriana. Ary tahaka izay tsy tian’ny olon-kojerena akory Izy ; natao tsinontsinona Izy ka tsy mba nahoantsika. Nitondra ny aretintsika tokoa Izy sady nivesatra ny fahoriantantsika; kanjo isika kosa nanao Azy ho nokapohina sy nasian’Andriamanitra ary nampahorina. Nefa Izy dia voalefona noho ny fahadisoantsika, sy notorotoroina noho ny helotsika; ny fampijaliana nahazoantsika fihavanan no namelezana Azy, ary ny dian-kapoka taminy no nahasitrana antsika.” Isa. 53: 3-5

“Jehovah o ! Sitrano dia ho sitrana aho; vonjeo aho, dia ho voavonjy aho . Fa Ianao no fiderako.” Jer. 17:14

“Fa ho tanterahiko ny fanasitrana anao , eny ho sitraniko ny faharatranao, hoy Jehovah, noho ny nanaovany anao hoe ilay noroahina sy hoe: Ziona tsy misy mpitady azy.” Jer. 30:17

“Dia indro, ho tanterahiko tokoa ny fanasitrana azy; eny, ho sitraniko izy ka hasehoko aminy ny haren’ny fiadanana sy ny fahamarinana.” Jer. 33:6

Ary hiposaka aminareo izay matahotra ny anarako ny Masoandron’ny fahamarinana, manana fanasitrana ao amin’ny tanany; ary hivoaka ianareo ka hifalihavanja toy ny ny zanak’omby mifahy.” Mal. 4:2

“Misy marary va eo aminareo? Aoka izy hampaka ny loholon’ny fiangonana, ary aoka izy hanosotra diloilo azy amin’ny anaran’ny Tompo ireo sady hivavaka eo aminy. Ary ny fivavaky ny finoana dia hamonjy ilay marary, fa ny Tompo hanangana azy. Ary raha nanota izy, dia havela ny helony.” Jakoba 5:14, 15

### **Teny Fikasana Hahazoana Hery Hanaovana Ny Sitrapon’Andriamanitra**

“Ary tsy ketraka izahay; fa na dia mihalevona aza ny toetray ivelany dia havaozina isan’andro isan’andro kosa ny toetray anatiny. Fa ny fahorianay maivana, izay vetivety foana, dia mainka miasa fatratra indrindra ka mahatanteraka voninahitra mavesatra maharitra mandrakariva ho anay, raha tsy mijery ny hita izahay, fa ny tsy hita; fa ny hita dia ho vetivety foana , fa ny tsy hita no maharitra mandrakizay.” 2 Kor. 4:16-18

“Ary aza mba ketraka amin’ny fanaovan-tsoa isika, fa amin’ny fotoan’andro no hijinjantsika raha tsy reraka isika.” Gal. 6:9

"Mahay ny zavatra rehetra aho ao amin'Ilay mampahery ahy." Filip. 4:13

“Fa Andriamanitra no miasa ao anatinareo na ny fikasana na ny fanaovana hahatanteraka ny sitrapony.” Filip. 2:13

“Nefa hoy Izy tamiko: ‘Ampy ho anao ny fahasoavako, fa heriko dia tanterahina amin’ny fahalemena.’ Koa mainka sitrako ny hirehareha amin’ny fahalemeko, mba hitoeran’ny herin’i Kristy amiko.” 2 Kor. 12:9

### **Teny Fikasana Momba Ny Maha-Vavolombelon’Andriamanitra**

“Aza matahotra na mangovitra ianareo; tsy efa nampandre anareo hatramin’ny fahiny va Aho ka nanambara taminareo? Eny, ianareo no vavolombeloko. Misy Andriamanitra afa-tsy Izaho va ? Tsia, tsy misy Vatolampy; tsy hitako izany.” Isa. 44:8

“Mitsangàna, mihazavà; fa tonga ny fahazavanao! Ary ny voninahitr’i Jehovah efa miposaka aminao.” Isa. 60:1

“Fa izany rehetra izany dia avy amin'Andriamanitra, Izay nampihavana antsika taminy amin'ny alalan'i Kristy, sady nanome anay ny fanompoana fampihavanana." 2 Kor. 5:18

“Fa hoy Jehovah tamiko: Aza manao hoe: 'Mbola zaza aho; fa handeha amin'izay rehetra anirahako anao ianao, ary izay rehetra andidiako anao no hambaranao.” Jer. 1:7

“Fa hahazo hery ianareo amin’ny hilatsahan’ny Fanahy Masina aminareo; ary ho vavolombeloko any Jerosalema sy eran’i Jodia sy Samaria ary hatramin’ny faran’ny tany”. Asan’ny Apostoly 1:8

“Fa ianareo kosa dia taranaka voafidy, fanjaka-mpisorona, firenena masina, olona nalain’ Andriamanitra ho an’ny tenany, mba hilazanareo ny hatsaran’Ilay niantso anareo hiala tamin’ny maizina ho amin’ny fahazavany mahagaga”. 1 Petera 2:9

“Fa manamasina an’i Kristy ho Tompo ao am-ponareo, ary ho vonona mandrakariva ianareo hamaly izay manontany anareo ny amin’ny anton’ny fanantenana ao anatinareo, nefa amin’ny fahalemem-panahy sy ny fanajana”. 1 Petera 3:15